

《露營》

盧韶暉

人物：亞撈，亞聰，招利，司徒，亞四，野獸

人物性格：1) 亞撈：喜歡以朋友嘅過失同缺點作為取笑對象，為人現實，斤斤計較。

2) 亞聰：亞四嘅男朋友，自私，只顧自己同女朋友想。心直口快。

3) 招利：渾渾噩噩，亞撈經常取笑嘅對象，心地善良，樂於助人同朋友，無主見。

4) 司徒：為人正直，做事有計劃，在眾人中擔任領導位置

5) 亞四：亞聰嘅女朋友，為人善於交際，懂得與人相處

6) 野獸/鬼：畜牲

第一幕：西貢百佳門外

司徒：(見到亞撈同招利向到等緊，走過去) HI.....乜咁準時啊！

亞撈：不嬲都咁準時嫁啦！兼且係你約嘅，邊敢遲啊！（笑笑口）

招利：我都係到左無幾耐。

司徒：而家靜係亞聰同亞四未到，等埋佢地就可以入百佳買野出發。

你地有無帶齊啲野啊，而家都幾凍嫁，有無帶睡袋啊？

亞撈：有啊！

招利：ME TOO！

司徒：果到夜晚好黑嫁喎，你地有無帶電筒啊？

亞撈：有啊！

招利：我都有啊！

司徒：亞撈，我叫你帶啲米你有無帶啊？招利你有無帶火機啊？

亞撈：YES，SIR！（有啲唔耐煩）

招利：有！

司徒：（恍然大悟）啊！係啦！依樣好重要，依樣好重要啊！你地有無帶.....

亞撈：（搶住講）司徒，唔駛再問啦！我也都有帶，我連電視機都帶埋啦，OK！

招利：（好開心）係咩！哈.....我都唔笨！我都有帶，今次醒啦掛？

（兩人唔出聲咁望住招利）

招利：（望下兩人）唔信啊？我搵出黎比你地睇下！你地等等。（即刻開袋搵野）

亞撈：唔駛啦！我信！（擺手扮頭）

招利：唔係喎，比你地睇下好啲。（繼續搵）

亞撈：唔駛啦。（招利繼續）都話唔駛咯。（招利繼續）唔駛啊！（發火）

（招利停左手）

司徒：你兩個咪玩啦！（望下手錶）啊，乜亞聰同亞四咁耐？

亞撈：係喎！唔講唔覺，一講就好似等左好耐咁！依家幾點啊？（睇司徒手錶）哇！一點半！有無搞錯啊，遲咁多！

招利：或者佢地因為有啲事所以先遲啫！

亞撈：或者或者，或者佢地撞車呢！

司徒：喂！咪咁臭啦把口。

（依個時候，亞四向眾人急步走過黎，亞聰卻慢慢的在後跟著）

亞四：（有啲喘氣）對唔住啊！

司徒：做咩咁遲啊？

招利：係咪有咩事啊？

亞撈：係咪撞車啊？

亞聰：撞車？哇！你把口都幾臭喎！

亞撈：唔係撞車，咁做乜咁遲啊？

亞聰：唔怕老實話你聽，我同條女去左睇相機，咁睇到興起咯，咪睇多陣囉，我又無話一定要你等埋我，係你自己傻仔姐。

亞撈：咁即係咩意思啊！遲到仲話我傻仔！（發火）

亞四：真係好對唔住啊！我地.....

亞撈：（截住亞四講野）我唔係同你講野！我同佢講野！（指住亞聰）你個自私鬼，次次都.....

司徒：好啦！夠未啊！咁難得約出黎一齊玩，係要破壞啲開心氣氛嫁？係咪咁先開心啊！（指住亞撈同亞聰）你兩個唔好再嘈啦，如果唔係就取消依次露營！

（走入百佳）

亞聰：車.....佢撩我啫嘛！

亞撈：我撩你？如果唔係你.....

招利：殊.....咪嘈啦，司徒就發火啦。（招利一邊講，一邊推亞撈入百佳）

第二幕：百佳內

司徒：要買啲方包聽朝做早餐，買啲牛油當油煮野。啊！依樣好重要，依樣好重要啊！記得要買 GAS 屎，唔記得買嘅話大家就一齊食西北風啦！

招利：咁今晚食咩啊？不如買隻火雞應下節啊！

亞聰：咪傻啦招利，成隻買幾錢啊！我地食得曬咩！諗野都唔經大腦！計我話呢，應該買多啲牛扒，我同亞四都好鍾意食嫁！

招利：又係嗱！牛扒都唔錯。

亞撈：咩唔錯啊！直頭唔掂啦！牛扒嗱，你兩個人岩食啫嘛！你都唔知我、司徒同埋招利都係鍾意食豬扒，點計啊都係買豬扒抵啲啦！有三個人岩食。幾時輪到你啲牛扒啊！都唔知邊個諗野唔經大腦！

亞聰：哈！你依啲係咩理論啊！買野食要計嫁咩？我都未聽過！咁不如計下每人要攝取幾多養份，消耗幾多卡路里，之後先買野食，唔好買多又唔好買少，咁好未啊？我都未聽過買野食係要計嫁嗱，買野食就梗係買自己鍾意啲嫁啦！都唔知邊個傻仔係到左計右計。

亞撈：（指下自己）我係傻仔？如果我係傻仔，（指亞聰）你就肯定係自私菌上腦！個腦諗親啲野都只係對自己有利，從來唔會為其他人諗下。我話你唔單只自私菌上腦，直頭係自私菌帶菌者，周圍向到散播自私菌，仲以為自己好叻。（望亞四）亞四，我勸你都係離開依個病人遠啲好，費事比佢傳染啦。就算唔會傳染啊，但係有個咁男朋友，都映衰自己啦，我勸你搵過個仲好！

亞聰：（憤怒）搵你好無！係到教人地分手，唔抵得我有女啊？話我自私！你好好咩！斤斤計較，樣樣野都計到咁足！你咁鍾意計，做咩唔入精算系計數姐，

係到計埋啲豬扒牛扒！

亞撈：我點解計依啲野係因為買野食啲錢係人人都有份出，咁做咩要我地三個人就你兩個啊！而且少數係應該服從多數，所以應該買豬扒。你話係咪啦，招利？（望招利）

亞聰：（望招利）招利，唔好聽佢講廢話！牛扒營養好，又好食，仲可以隨心所欲咁控制塊扒幾成熟，又多變化又好玩！你話啦，係咪牛扒好啲先。

招利：我.....

亞撈：（搶住講）咁多變化擺黎托咩！（搭住招利膊頭）招利，唔好信佢啊！佢顛嫁，啲扒黎玩！我知你好鍾意食豬扒嫁，你會揀豬扒嫁，係咪？

亞聰：（搭住招利另一邊膊頭）你要試下新野先得嫁，招利！信我！牛扒係你唯一選擇！

亞撈：招利，豬扒係你老朋友啊！

亞聰：唔係啊，招利！牛扒會係你新歡。

亞撈亞聰：（同時講）一句講晒，你揀豬扒定牛扒先？

招利：（支吾以對）咁呢.....其實豬扒同牛扒都唔錯。不過呢.....吉列豬扒就好似好過西冷牛扒少少，但係如果將西冷牛扒打成黑椒牛丸呢，咁就.....

司徒：你兩個煩唔煩啲啊！少少事都可以嘈咁耐，幾歲啊！破壞曬啲氣氛，係咪唔想去姐！

亞四：其實我地唔駛為左買咩扒而嘈嫁。我地可以分開黎買，邊個鍾意豬扒，咪買豬扒囉，邊個鍾意牛扒嘅，咪買牛扒囉。唔駛話一定要全部一樣嫁。

亞聰：都係你醒！有啲人連咁簡單都諗唔到。

亞撈：邊個話我諗唔到姐，我唔講啫嘛！我想睇下你仲想嘈幾耐我先唔講啫。

亞聰：我又無講話你諗唔到。我話招利啫嘛，你又搶住黎認。

司徒：好啦！咪煩啦。咁我地就分開黎買啦。買完就係門口等！

亞四：哦，好啊。

（司徒、亞撈同招利走左邊，亞聰同亞四走右邊）

（過左一陣，買完野食，大家就分工擺食物同用品）

亞聰：女仔應該唔駛擺野啦。

司徒：哦，好啊。

亞四：咁唔該曬啦。

招利：唔駛。

亞聰：咁我擺依袋啦。（隨即拿起一袋，好快咁走左去）

亞撈：喂，喂.....有無搞錯！一係就拿袋最輕！依個縮骨精真係.....唔得！唔可以比佢成日都係咁！（正想追出去）

招利：（阻止亞撈）算啦！都唔係好重姐，咪由佢囉！

司徒：係囉！你都咪計較咁多啦！（拿起一袋走左）

亞撈：點得嫁，成日都係咁！咁樣係姑息養奸啊！（又想追去）

招利：咁啦！我擺最重個袋啦，咁你就唔好追上去，OK？

亞撈：唉！好啦好啦！算佢好彩。（拿起一袋）

招利：咁咪好囉。（拿起一袋）

亞撈：（笑笑口，拍下招利的背囊）但係你部電視機唔重咩？

招利：我部電視機？我唔明啱？

亞撈：哇哈哈！你真係好鬼蠢！

招利：我唔明喎？

司徒：（遠處）喂！你兩個行快啲啦，有車啦！

亞撈招利：哦，黎啦！（快步走去）

第三幕：目的地（露營嘅地點）

亞四：哇！依到好靚啊！個沙灘好乾淨啊，啲沙又白，啲海水都又清又無垃圾！

亞聰：係喎！係到游水都唔駛驚食垃圾。

司徒：梗係啦，依到好少人泥，所以咪咁乾淨囉，絕對係露營好地方！

招利：咁我地盡量唔好整污糟依到啦。

亞撈：車！怕咩姐！就算我地唔整，其他人黎都整啦，咁我地駛乜怕整污糟姐！

司徒：咁又唔係咁講！我地唔整污糟嘅地方，下次再黎都乾淨啲。雖然唔擔保人地整唔整，但自己安心嘛！

亞聰：哇.....依啲人真係.....真係好難形容啊！

亞四：（推亞聰）你都咪嘈啊！

（所有人行左一陣）

司徒：好啦，我地就係依個草地搭營。唔.....就快天黑啦，我地快啲準備下啲野先。亞聰，你同亞四就留係到搭營啦。啲野係到。（從袋中拿出）

亞聰亞四：OK！

司徒：招利，你擺個水袋去溪邊裝水。

招利：邊到有溪啊？

司徒：我地岩岩行泥條橋，下面咪條溪囉！你無睇到咩？

招利：係咩？我睇唔到。咁好啦，包係我身上。（走左去）

司徒：亞撈，你去執啲石頭泥當爐，五舊夠啦。

亞撈：哦，好。（諗左一陣）係喎，你呢司徒？

司徒：你放心，我有野做。我去執啲樹枝番黎，搭個營火，玩又得，取下暖又得。

亞撈：哦！咁我就放心。（走左去）

各人的情況

亞聰、亞四

亞四：點樣搭嫁個營？你識唔識嫁？

亞聰：梗係識啦！之前露營司徒教過。將營啲野倒曬出黎先。（倒野曬啲落地）！鋪開個營先，之後將啲骨插入去，頂起個營。再綁埋啲繩，先好落營釘。啲釘同繩未用住，擺係到先。（擺係一邊）一陣用先擺。

（野獸從後靜靜擺走兩枝釘同一條繩，兩人不知，開始搭營）

亞四：係咪咁啊？

亞聰：係啦，一陣再綁埋啲繩。

亞四：（0 有的驚，拍下亞聰，細聲講）你覺唔覺有野望緊我地啊？

亞聰：無啊。

亞四：唔係呢！由我地搭營開始我就覺得有野望緊我地啦，係草叢邊啊！依到咁僻，會唔會係啲污糟野嫁！

亞聰：（笑）哈哈！你啲想像力真係夠曬勁。（見亞四仲很擔心）放心啦，有我係到乜鬼都驚啦，仲邊敢過黎啊！你拿啲釘過黎比我啦，就好啦。

（亞四擺釘過去，亞聰入營釘）

亞聰：（奇怪）咦咁奇怪！啲營釘同繩都應該岩岩好嫁！點解依家差兩枝釘同一條繩？去左邊呢？（周圍搵）去左邊呢？

亞四：（驚）我都話有啲奇怪野望緊我地嫁啦，睇黎係佢走左啦！

亞聰：（有啲驚）傻啦！應該係唔見左姐！用住石頭先啦。等司徒番黎再問清楚。

招利

招利：咦，係依到啦喎。哇！啲水好清啊！仲有水交剪添，啲水一定係好乾淨嫁啦。好，等我搵下邊到啲水最清先。（放低水袋係地）

（野獸出黎，將水袋擺係其他地方）

招利：依到唔係太好，等我去第二到先。（走番原位）咦！我個水袋呢？明明擺係到嫁！（再行前，見水袋）咦！點解會係到！我岩岩好似唔係擺係到嫁喎。算啦，可能係我記錯姐。（將水袋擺番係原位，又走到第二邊睇水質）

（野獸再出黎，將水袋擺係其他地方）

招利：唔！依到唔錯。等我拿個袋過黎裝水先。（走番原位）咦！我個水袋又唔見左？（再行前，又見到水袋）點解係依到？我記得岩岩我唔係擺係到嫁喎！今日真係奇怪，硬係覺得自己傻下傻下咁，成日記錯野！（拿起水袋想裝水）咦！咩泥嫁？（招利睇下隻手，有啲黏液）痴粒粒，（聞下）仲有啲臭添，都唔知咩黎，等我洗左佢先。

亞撈：（行緊）要五舊石啊！哇！攞命！啲石頭太細又坐唔到，太大又抬得辛苦，今次真係捉蟲！司徒都唔公平，亞聰亞四兩個人搭營，駛唔駛咁多人啊！應該搵啲黎幫下我啦！早知就唔答應得咁快啦！唔得，一陣番去要抗議下先。

（行到一草叢前）

亞撈：一次執唔曬。唉！唯有分開幾次啦。（走入草叢，執起一舊。）

（野獸同時在草叢的另一則執起一舊）

亞撈：（走番出黎）第一舊！（放低石頭係地上，再走進草叢執石）

（野獸就親亞撈入草叢時候將石頭放係亞撈啲石頭旁邊，跟住又去執石）

亞撈：（走出黎放石）第兩舊！（又入草叢）

（野獸放石，又入去執石，唔好出黎住）

亞撈：（停低）啊！乜隔離好似有啲腳步聲？（拿石走出去，放低石頭）第三.....咦！岩岩無依兩粒石仔嫁喎？（望下隔離）無人啱！（有啲疑惑）咁奇嘅！（又入去）

（野獸出黎放石，又入去）

亞撈：又有聲喎！（出泥）第四.....又多舊！搞乜鬼啊？唔理啦！快快脆脆搞掂走人！

司徒（在草地上）

司徒：要玩營火啲樹枝就要乾啲，等我搵啲乾啲嘅樹枝番去先。（周圍執，執到成手都係）依到未夠玩，放低佢再執啲先。（放低樹枝又走開）

（野獸出黎將一枝骨頭放係樹枝上）

司徒：（又執到成手都係，番去放低）依到就差唔多啦，再執多些少先。咦！骨

頭黎嫁！我岩岩又睇唔到！哈！我咁都可以睇錯。睇落似人骨多過似樹枝啦，我咁都可以睇錯，唔通近視深左？（執起骨頭，用力掉出去）無鬼用！（又去執樹枝）

（野獸再次出黎將岩岩枝骨頭放番係樹枝上）

司徒：（番泥）搞掂囉啦！走得。（又見骨頭，執起）又有？咁似岩岩依枝！我明明掉到好遠嫁喎！點解又會係到？算啦，唔關我事。（掉低骨頭，拿起樹枝走）

（所有人都完成左佢地嘅任務。亞聰同亞四係營邊講緊笑，亞撈捧住啲石頭行出黎，招利抽住個水袋行黎，司徒就拿住啲樹枝行出）

亞撈：哇！好重啊！（掉低石頭）

招利：好野喎！一個人攞咁多。（放低水袋）

亞撈：你串我啊？

司徒：辛苦囉啦！今晚食多啲當補數。（放低樹枝）

亞撈：哇！你兩個疏乎啦！（指住亞聰亞四）兩個人用一個營，又唔駛行，仲有時間係到傾計。司徒，你話係咪唔公平先，一陣應該你地煮飯。

亞聰：你話啊！入釘唔駛用力？我依家隻手都痛曬，你仲以為好疏乎喎！應該你煮就 差唔多！

亞撈：你食屎啦！你兩個人入幾支釘姐。我一個人拿五舊石啊！舊舊都差唔多大過你個頭啦。依家仲要我煮飯，我采你都傻！

亞聰：唔煮啊？唔煮唔好食囉，咁簡單！

司徒：你兩個都要黎幫手煮飯！我就去隔離起個營火先。（走左去）

亞撈：喂！司徒！有無搞錯啊！根本唔公平！啲人做咁少野就應該煮飯姐，我搬咁多石頭又要煮，真係.....（氣憤）

亞聰：咩啊？唔順氣啊？我係做得少啲野嫁啦，但係司徒要我同你都要煮飯啊！吹咩！吹咩！

亞撈：（忍住）好！好！（指住亞聰）我忍你！我忍你！我煮！

（過左一陣，天已經黑曬，眾人圍住個火爐坐，旁邊有個營火）

招利：（聞下）哇！啲煎餃子好香啊！

亞聰：食得未嫁，煎咁耐，餓死我條女啦！（想去夾）

司徒：未得嫁，未夠熟啊！

亞撈：你咪剩機夾一舊啊！

亞聰：嘩.....

（又過一陣）

司徒：而家就得啦。

亞撈：哇，好啊！餓死人啦。（正想夾）

亞聰：喂！咪夾住！你唔知咩叫 GENTLEMEN 咩，梗係 LADY FIRST 嫁啦，無啲風度。

司徒：都岩嘅。

招利：咁食先啦亞四。

亞撈：車！我無話唔比亞四食先啲！隨便。

亞四：咁我唔客氣啦！（夾一舊黎食）哇！好脆好好味啊！

亞聰：係咩？等我試下。（好快咁夾左一舊去食）

亞撈：（大喝）喂！你做咩啊！

亞聰：你睇唔到咩？我係到食野囉！

亞撈：（震怒）我就係問你係到做咩啊！

亞聰：咁我講清楚啲。（漸隻字講）我係到食緊啱啱煎好嘅餃子啊！你係咪嚟嫁！（轉向亞四）又真係幾好味喎！

亞撈：（憤怒，大聲）你依個人真係真係濺到出汁啊！又遲到！又縮骨！野你又做得少過人，食你居然咁食先！之前如果唔係佢地阻住我，我一早同你反面！而家就算佢地係到，我一樣同你反面！

亞聰：車.....我話 LADY FIRST 啊嘛！咁我條女食左一舊，咪到我地食囉！唔岩咩！

亞撈：就算食都唔到你食先！

司徒：喂！亞撈，駛乜咁嬬姐，仲有好多啊！佢食一舊先姐，算啦！你食番多幾舊啦！

亞撈：司徒，你成日都係咁樣！你咁樣係係到姑息緊佢啊！我唔理啊！今次我實追究到底！

招利：哎呀亞撈，咪成日斤斤計較啦！

亞撈：哦！而家個個都幫住佢啦，仲話我斤斤計較，咁即係我唔岩啦又！你地個個都係咁！（大叫）我錯！我錯囉！你岩囉！我乜都唔食啦好未啊？你食飽佢啦！（走左出去）

招利：喂！喂！（向司徒）我去跟住佢！（跟住走出）

司徒：哦！好。

（亞撈同招利係沙灘，另外三人係草叢）

（過左一陣）

三人：哇！（跑出）

招利：咩事啊？好似咁驚嘅！

亞四：（喘氣）有……有……有對發青光嘅眼啊係草叢到！

招利：係咪啊？你講笑啊？

亞聰：係啊！無講笑啊，真係有對青光眼啊！唔知係咩黎？

（亞撈無理會佢地）

招利：係？咁恐怖！

司徒：啊！我醒起啦！我今日遇到怪事啊！我執樹枝個陣，無啦啦有舊骨係啲樹枝上邊，但係我執野個陣睇得好清楚嫁，應該唔會執錯！之後我好用力咁掉舊骨出去啦，點知轉個頭姐，舊骨又係番到喎！我都覺得好怪，講起舊骨啊，仲 O 有的似人骨添啊！

招利：我都唔知我係咪遇到怪事。我拿個水袋去入水啦，將個水袋擺係地下，點知行開一陣番黎就覺得個水袋位置唔同左喎！我仲以為我大慳無記性啦！啊點知，第二次又係咁喎！仲有個水袋有啲黏液添啊！你地唔講起我都唔覺得怪！

亞四：我地都有啊！我地搭營個陣唔見左啲營釘同繩啊！

亞聰：係啊！司徒你啲營釘同繩都應該齊嫁（司徒點點頭），無理由會少咁兩支釘同一條繩嫁，都唔知邊個偷左？

亞四：仲有嫁！我地搭緊營個陣，我硬係覺得有野望住我地，我個陣講你又唔信喎！

（指住亞聰）

亞聰：哦！係啦係啦，你岩你岩！亞撈咁你有無遇到怪事啊？

亞撈：好熟啊！嘩……

司徒：咁即係有無啊？

亞撈：(O 有的唔奈煩) 有.....今日我執石嗰陣聽到係我隔離草叢有啲腳步聲
喎，但係我去望下嗰陣又無人喎，而且我每執完一次石，係啲石隔離都會多左
一粒細石啊，就係咁囉！

司徒：咁即係個個都有喎，咁奇怪！

亞四：(驚) 哎呀！都唔知係咪啲污糟野啊！

亞撈：(見眾人都很擔心，專登講) 係啊！我之前睇書話呢依到好猛嫁！又話咩
日本軍隊殺人場啊！亂葬岡啊！我好多 FRIEND 都係咁講啊！依到啲鬼無頭無手
嫁，好核突又好恐怖嫁！

司徒：咪傻啦！依啲野都無科學根據，我就唔信啦！

招利：咁又唔係啊！寧可信其有，不可信其無啊！

亞聰：依家咪講依啲野住先啦！唔趕走佢啊，今晚會好唔安心嫁！而且我地啲
野食係邊啊！我地未食嫁！

亞撈：嘩.....依家仲講食唔食！

亞聰：你咪嘈啦！計我話呢，鬼就驚人，俗語都有話啦，人怕鬼三分，就鬼怕
人七分啊嘛！我地駛乜驚佢姐，一齊走過去大聲亂叫，佢實驚我地！

亞撈：我做咩要聽你講啊！我偏唔鍾意啊！我有我自己方法，我駛咩聽你講！

亞聰：你有自己方法咪自己試囉！不過唔駛諗住我地會幫你！

亞撈：嘩！我無話要你幫！不過你唔比佢地幫我，佢地都唔准幫你！你夠雷，
就一個人去啦！

亞聰：嘩！去咪去！

亞四：唔好去啦！

司徒：係囉，單獨一個行動唔係太好。

招利：可能會有危險添！

亞聰：放心啦！我個方法實得，睇我表演啦！

（好小心咁行向草叢，企係草叢前面）

亞聰：（深呼吸，放聲大叫）哇啊呀！

野獸：噫.....噫.....

（亞聰立即跑番出黎）

亞聰：哇！佢發黷啊！

亞四：你無事啊嘛？

亞撈：（冷笑）哼.....我仲以為乜野方法咁巴閉，原來得個講字，仲講到自己實得咁，真係唔知個醜字點寫！

亞聰：你咁叻，你去試下啊笨！

亞撈：嘩！

（一邊行過去，一邊揸電筒，然後企係草叢前面開燈亂照，青色眼好似唔見左）

亞撈：你地睇下，我成功左啦！佢比我嚇走左啦！（熄番電筒）

亞聰：哈！你個方法就係搵枝電筒照佢啊？依啲方法係傻仔先諗得到，而且白痴仲會話自己得左添！你就係白痴啦！

亞撈：你白痴兼無眼添啦！你睇唔到隻野走左咩！

亞聰：你睇下你後面先講啦！超級白痴！

亞撈：後面？（轉過頭，見青色眼又出現番）哇！

野獸：噫.....噫.....

亞撈：對唔住啊！唔好黐大佬，我走我走！（快跑番去）

亞聰：點啊，白痴！你唔係得左嘅咩，做咩咁驚跑番黎啊？

亞撈：.....

招利：咁落去唔掂喎！唔通企係到天光咩！

司徒：不如咁啦，我地試下一齊出擊啦！

亞撈：同佢？我唔想啲！

亞聰：我都唔想降 **GRADE** 同啲白痴合作！

司徒：咁你地係咪想成晚係到企，企到聽朝啊？係咪想食西北風當晚飯啊？唔食煎餃子啦？

（眾人沉默了一陣）

亞撈：唉！好啦，好啦！我就將就一下，同你個 **CHEAP** 精合作！

亞聰：咩啊！你估我好想同你合作咩，如果唔係司徒.....

司徒：喂！好啦！咁我地就一齊過去啦！

亞四：要一齊過去啊！我好驚喎！

司徒：咁啊.....

亞撈：咁啦，亞聰係後面陪住亞四。你兩個咁細粒，行前面都無用啦！你兩個就攞住啲電筒幫我地照前面啦！

亞聰：哦，好啊！咁易做。

司徒：咁都好。咁我地三個行前面。啊！我地可以攞住啲火把黎嚇佢，又可以當武器喎！

亞聰：不如咁啦，我地行到埋去，之後一齊大叫，你地亂揮嘅火把，我同條女亂搖電筒！睇下咁樣嚇唔嚇得走佢，你地話好唔好？

亞撈：好啊！咪試下囉！招利，你唔係有帶電視機咩。拿埋出黎，開左佢，較到最大聲，嚇下佢嘛！

招利：好啊！不過我都有啲驚驚地啊！可唔可以行後面啊？（正攞緊電視機）

亞撈：（搭住招利膊頭）扮咩細膽啊你！

招利：唔係啊！我真係驚嫁。

司徒：喂！過泥擺嘅火把先！

（三人去擺火把，亞聰亞四在後面跟住，開曬嘅電筒）

司徒：好，行得。

（眾人行到草叢前面，之後亂揮火把電筒，而且大聲叫）

眾人：（大聲）哇嗚啊呀！

（草叢一陣郁動，野獸走左，眾人鬆左一口氣）

亞聰：YEAH！終於搞掂！（同亞撈擊掌）

亞撈：YEAH！終於搞掂！（同亞聰擊掌）

（擊掌後，兩人立即走開，好似有啲唔好意思）

司徒：咪合作得幾好！

亞四：係啊！好采佢受嚇咋！如果唔係今晚就要訓沙灘啦！

司徒：不過唔好咁快開心住，唔擔保佢一陣唔番黎！

招利：唔係啊！咁驚！

亞撈：咁我地快啲食曬啲野，早啲訓，聽朝早啲走。

司徒：唔！咁等我落曬啲野去煮先！你地食住先！

眾人：哦，好。

第四幕：目的地（露營嘅地點）

招利：（打喊露）哇呀呀。咦！天光啦喎。喂！起身啦！天光啦！起身執野走啦！

亞撈：（立即起身）係喎！快啲起身執野啊！

（過左一陣，眾人已經執好曬啲野，準備離開）

司徒：你地執好野未？

眾人：執好！

司徒：有無漏野？

眾人：無！

司徒：好，出發！

（眾人在沙灘上行緊）

招利：咦！（望地下）依啲係.....

亞撈：一睇就知係動物腳印啦，傻佬！

招利：我知，咁即係.....

亞聰：即係依到有動物囉，蠢蛋！

招利：我都知依到有動物，但係你唔覺得可疑咩！可能琴晚啲事同依啲腳印有

關呢！不如去睇下囉！

亞撈：咪扮醒啦招利！你平時啲直覺都唔準，分析力又唔係太好啫，睇黎你都係搞錯嫁啦今次！

司徒：但係我都想去睇下啫！

亞四：我都係！我想睇下係咩動物？

亞撈：哦好，咁咪去囉！

（眾人沿住腳印前行，去到一沙灘石隙）

亞聰：喂！你地過泥睇下，係一隻黑色野狗！

亞四：佢訓緊覺啊！好搞野啊！

亞撈：車！有咩好睇姐！通街都係啦！

招利：咦！隻狗隔離有啲野啊！

司徒：睇下咩黎？（望左陣）咦！我啲營釘同埋繩啫！仲有我話嗰舊似人骨 d 骨頭啊！哦！我明啦！原來所有野都係依隻衰狗搞出黎 d 傑作！偷營釘、搬石仔、咬水袋、玩骨頭、青光眼，全部都係依隻野搞鬼！偷我野咁衰啊，等我執番啲營釘同繩先。（落去執野）

招利：都話我估得岩嫁啦！邊個話我直覺唔準分析差啊！（對住亞撈講）

亞撈：（無理招利）哼！原來係依隻野！

亞四：係啫！仲等我驚足成晚添！

亞聰：唔緊要啦！都唔係得你一個人驚，亞撈都有驚啦，哈哈（大笑）！

亞撈：邊個話啊？我有驚？招利就驚，仲驚到想行後面添，想學亞四添啫！哈哈！（大笑）仲係到講咩寧可信其有，不可信「條毛」啫！我就真係信錯你依條蠢毛啦！哈哈！（大笑）

招利：嘩！我得講字姐，你仲做埋出黎啦！係到擺電筒照隻狗！成個傻仔咁！哈哈！

亞撈：你地話係鬼我先咁做啫嘛！亞聰夠話人怕鬼三分，鬼怕人七分，又係到大叫驅鬼，真係搞笑！

亞聰：夠招利啲驅鬼方法搞笑，用電視機啊！哇哈哈！（大笑）笑爆咀！如果你咁都得啊，其他道士實失業啦！

招利：咩啊！亞撈叫我嫁！

亞撈：其實講咁耐，最驚就係司徒，我琴晚見到佢腳震啊！哈哈（大笑）

亞四：係咩？哈哈！（大笑）原來司徒最驚，仲要扮振定！

司徒：喂！你咪屈我喎！咁黑你點睇啊！你地唔好唔記得啊，係邊個話依到好猛嫁！係到扮曬專家！

亞四：係喎！如果唔係你講到似曾曾，我都唔會咁驚啊！最衰都係你！（指亞撈）

亞撈：係咩？我有講過咩？

眾人：肯定有！

亞撈：其實我諗住嚇下你地，順便同你地開下玩笑姐！

眾人：好好笑咩？

亞撈：咁對唔住囉！

眾人：（大笑）哇哈哈！

完